

## VI. 伍子胥變文

昔周國欲末，六雄競起，八●諍侵。南有楚國平王，安仁治化者也。王乃朝庭萬國，神威遠振，統領諸邦。外典明臺，內昇宮殿。南與天門作鎮，北以淮海為關，東至日月為邊，西與佛國為境。開山川而迴軸，調律呂以辯陰陽。駕紫極以定天闕，撼黃龍而來負翼。六龍降瑞，地像嘉和，風不鳴條，雨不破塊。街衢道路，濟濟鏘鏘，蕩蕩坦坦然，留名萬代。楚之上相，姓伍名奢，文武附身，情存社稷。手提三尺之劍，清託六尺之軀。萬邦受命，性行淳直，儀節忠貞，意若風雲，心如鐵石，恒懷匪懈，宿夜兢兢。事君●致為美，順而成之。主若有僭，犯顏而諫。伍奢乃有二子，見事於君。小者子胥，大名子尚。一事梁國，一事鄭邦，並悉忠貞，為人洞達。

楚王太子長大未有妻房。王問百官。誰有女堪為妃后。朕聞國無東宮，半國曠地。東海流泉溢，樹無枝，半樹死。太子為半國之尊，未有妻房，卿等如何。大夫魏陵啟言王曰。臣聞秦穆公之女年登二八，美麗過人。眉如畫月，頰似凝光，眼似流星，面如花色。髮長七尺，鼻直顏方，耳似瑤珠，手垂過膝，拾指纖長。願王出敕，與太子平章。儻若得稱聖情，萬國和光善事。遂遣魏陵，召募秦公之女。楚王喚其魏陵曰。勞卿遠路，冒涉風霜。其王見女，姿容麗質，忽生狼虎之心。魏陵曲取王情。願陛下自納為紀后。東宮太子，別與外求。美女無窮，豈妨大道。王聞魏陵之語，喜不自昇，即納秦女為妃，在內不朝三日。伍奢聞之，忿怒。不懼雷電之威，披髮直至殿前，觸聖情而直諫。王即驚懼，問曰。有何不祥之事。伍奢啟曰。臣今見王無道，慮恐失國喪邦。忽若國亂臣逃，豈不由秦公之女。與子娶婦，自納為妃，共子爭妻，可不慚於天地。此乃混沌法律，顛倒禮儀。臣若諫交，恐社稷難存。

王乃面慚失色，羞見群臣。國相可不聞道。成謀不說，覆水難收。事已如斯，勿復重諫。伍奢見王無道，自納秦女為妃。不懼雷電之威，觸聖情而直諫。陛下是萬人之主，統領諸邦，何得信受魏陵之言。

... 子尚遠承父書相喚 ... 欲救慈父 ... [鄭]王曰。卿父今被嚴刑 ... 不救父愆，何名孝子。卿須急去，更莫再三。子尚即辭鄭王，星夜奔於梁國，見弟子胥，具言書意。今為平王無道，信受佞臣之言。因繫慈父之身，擬將嚴峻，吾今遠至，喚弟相隨。事意不得久停，願弟急須裝束。

子胥見兄所說，遙知父被勾留，逆委事由，書當多偽。報其兄曰。平王無道，乃用賊臣之言，囚禁父身，擬將誅剪。見我兄弟在外，慮恐在後讎怨，詐作慈父之書，違道妄相下脫，此之情況，足得一 ... 誅戮，馳書相命，必是妖言，擬收 ... 不可登途，由如鈍鳥盪羅，泉魚 ...

... 今卻返具述胥言。適有羸疏，請君勿責。使人得語，便即卻迴，將繩自縛，乃見平王。啟平王曰。奉命身充為急使，月夜奔波歷數州，會稽山南相趁及，拔劍擬欲斬臣頭。臣懼子胥手中劍，子胥怕臣俱總收。彼此相擬不相近，遙語聲聲說事由。卻迴報你平王道，即日興兵報父讎。

楚帝聞此語，拍陸大嗔。勃逆小人，何由可耐。一寸之草，豈合量天。一筍毫毛，擬拒爐炭。子胥狂語，何足可觀，風裏野言，不須採拾。楚王使獄中喚出佞奢、子尚，處法徒刑。子尚臨死之前，仰面向天嘆而言曰。吾當不用弟語，遠來就父同誅，奈何。奈何。更知何道。吾死之後，願弟得存。忽爾天道開通，為父讎冤殺楚。遺語已訖，便即殺之。父子二人，同時誅戮。

楚王出敕，遂捉子胥處，若為。敕曰。梁國之臣，逆賊子胥，父事於君，不能忠謹，徒謀社稷，暴虎貪殘。子尚鄭國之臣，并父同時殺訖。唯有子胥逃逝，目下未獲。如能捉獲送身，賞金千斤，封邑萬戶。隱藏之者，法有常刑。先斬一身，然誅九族。所由寬縱，解任科徵，盡日奏聞。固身送上。

敕既行下，水楔不通，州縣相知，榜標道路。村坊搜括，誰敢隱藏，競擬追收，以貪重賞。子胥行至莽蕩山間，按劍悲歌而歎曰。子胥發忿乃長吁，大丈夫屈厄何嗟嘆。天網恢恢道路窮，使我恓惶沒投竄。渴乏無食可充腸，迴野連翩而失伴，遙聞天漸足風波，山岳峯嶠接雲漢。窮洲旅際絕●船，若為得達江南岸，上倉儻若逆人心，不免此處生留難。

## VII. 臨濟語錄

**A)** 府主王常侍與諸官請師升座。師上堂云、山僧今日事不獲已、曲順人情、方登此座。若約祖宗門下、稱揚大事、直是開口不得、無爾措足處。山僧此日以常侍堅請、那隱綱宗。還有作家戰將、直下展陣開旗麼。對眾證據看。

**B)** 僧問、如何是佛法大意。師便喝。僧禮拜。師云、這箇師僧、卻堪持論。

**C)** 問、師唱誰家曲、宗風嗣阿誰。師云、我在黃蘗處、三度發問、三度被打。僧擬議。師便喝、隨後打云、不可向虛空裏釘橛去也。

**D)** 上堂。云、赤肉團上有一無位真人、常從汝等諸人面門出入。未證據者看看。時有僧出問、如何是無位真人。師下禪床、把住云、道道。其僧擬議。師托開云、無位真人是什麼乾屎橛。便歸方丈。

**E)** 道流、山僧說法、說什麼法。說心地法。便能入凡入聖、入淨入穢、入真入俗。要且不是爾真俗凡聖、能與一切真俗凡聖、安著名字。真俗凡聖、與此人安著名字不得。道流、把得使用、更不著名字、號之為玄旨。

**F)** 問、如何是心心不異處。師云、爾擬問、早異了也、性相各分。道流、莫錯。世出世諸法、皆無自性、亦無生性。但有空名、名字亦空。爾祇麼認他閑名為實。大錯了也。設有、皆是依變之境。有箇菩提依、涅槃依、解脫依、三身依、境智依、菩薩依、佛依。爾向依變國土中、覓什麼物。乃至三乘十二分教、皆是拭不淨故紙。佛是幻化身、祖是老比丘。爾還是娘生已否。爾若求佛、即被佛魔攝。爾若求祖、即被祖魔縛。爾若有求皆苦。不如無事。

**G)** 道流、爾欲得如法見解、但莫受人惑。向裏向外、逢著便殺。逢佛殺佛、逢祖殺祖、逢羅漢殺羅漢、逢父母殺父母、逢親眷殺親眷、始得解脫、不與物拘、透脫自在。如諸方學道流、未有不依物出來底。山僧向此間、從頭打。手上出來手上打。口裏出來口裏打。眼裏出來眼裏打。未有一箇獨脫出來底。皆是上他古人閑機境。

**H)** 如山僧今日用處、真正成壞、翫弄神變、入一切境、隨處無事、境不能換。但有來求者、我即便出看渠。渠不識我、我便著數般衣、學人生解、一向入我言句。苦哉、瞎禿子無眼人、把我著底衣、認青黃赤白。我脫卻入清淨境中、學人一見、便生忻欲。我又脫卻、學人失心、忙然狂走、言我無衣。我即向渠道、爾識我著衣底人否。忽爾回頭、認我了也。

**I)** 今時學人不得、蓋為認名字為解。大策子上、抄死老漢語、三重五重複子裏、不教人見、道是玄旨、以為保重。大錯。瞎屢生、爾向枯骨上、覓什麼汁。有一般不識好惡、向教中取意度商量、成於句義。如把屎塊子、向口裏含了、吐過與別人。猶如俗人打傳口

令相似、一生虛過。也道我出家、被他問著佛法、便即杜口無詞、眼似漆突、口如楯檐。如此之類、逢彌勒出世、移置他方世界、寄地獄受苦。

**J)** 黃蘗、因入廚次、問飯頭、作什麼。飯頭云、揀眾僧米。黃蘗云、一日喫多少。飯頭云、二石五。黃蘗云、莫太多麼。飯頭云、猶恐少在。黃蘗便打。飯頭卻舉似師。師云、我為汝勘這老漢。纔到侍立次、黃蘗舉前話。師云、飯頭不會、請和尚代一轉語。師便問、莫太多麼。黃蘗云、何不道、來日更喫一頓。師云、說什麼來日、即今便喫。道了便掌。黃蘗云、這風顛漢、又來這裏捋虎鬚。師便喝出去。

**K)** 師聞第二代德山垂示云、道得也三十棒、道不得也三十棒、師令樂普去問、道得為什麼也三十棒、待伊打汝、接住棒送一送、看他作麼生。普到彼、如教而問。德山便打。普接住送一送。德山便歸方丈。普回舉似師。師云、我從來疑著這漢。雖然如是、汝還見德山麼。普擬議。師便打。

**L)** 王常侍、一日訪師。同師於僧堂前看、乃問、這一堂僧、還看經麼。師云、不看經。侍云、還學禪麼。師云、不學禪。侍云、經又不看、禪又不學、畢竟作箇什麼。師云、總教伊成佛作祖去。侍云、金屑雖貴、落眼成翳。又作麼生。師云、將為爾是箇俗漢。

**M)** 師問杏山、如何是露地白牛。山云、咩咩。師云、啞那。山云、長老作麼生。師云、這畜生。

**N)** 師初在黃蘗會下、行業純一。首座乃歎曰、雖是後生、與眾有異。遂問、上座在此、多少時。師云、三年。首座云、曾參問也無。師云、不曾參問。不知問箇什麼。首座云、汝何不去問堂頭和尚、如何是佛法的的大意。師便去問。聲未絕、黃蘗便打。師下來。首座云、問話作麼生。師云、某甲問聲未絕、和尚便打。某甲不會。首座云、但更去問。師又去問。黃蘗又打。如是三度發問、三度被打。師來白首座云、幸蒙慈悲、令某甲問訊和尚。三度發問、三度被打。自恨障緣不領深旨。今且辭去。首座云、汝若去時、須辭和尚去。師禮拜退。首座先到和尚處云、問話底後生、甚是如法。若來辭時、方便接他。向後穿鑿成一株大樹、與天下人作蔭涼去在。師去辭黃蘗。蘗云、不得往別處去。汝向高安灘頭大愚處去、必為汝說。師到大愚。大愚問、什麼處來。師云、黃蘗處來。大愚云、黃蘗有何言句。師云、某甲三度問佛法的的大意、三度被打。不知某甲有過無過。大愚云、黃蘗與麼老婆、為汝得徹困。更來這裏、問有過無過。師於言下大悟云、元來黃蘗佛法無多子。大愚擱住云、這尿床鬼子、適來道有過無過、如今卻道、黃蘗佛法無多子。爾見箇什麼道理、速道速道。師於大愚脅下、築三拳。大愚托開云、汝師黃蘗、非于我事。